

Korint 1 adi letama pakanama

Pol na waikaiwama

Kapore yau banagama Korint nopone miemienimima,

¹ Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol, Mamaitua varinama verenama yà rau-guguyena. Taugu be turadama Sostenes ² mate uma letanama ka girugirumina, taumi Mamaitua na ekalesiama Korint nopone miemienimima ġaromie. Mamaitua tauwai sumāga dobu matabuna ya vinedina, taudi vutudi Keriso isane tawai sumāga be ta moimoiragina. Be taumi mate Yesu Keriso ya kawa babaumi be ya vinemi da taumi tauna ġaroġaronama. Tauna taudi be tauda matabuda dà Badama.

³ Mamaitua Tamadama be Bada Yesu Keriso adi raukivivere be adi subama ġaromie.

⁴⁻⁵ Raġon matabuna taugu Mamaitua yàwai kai-wena taumi aubaimima, baninama tauna Yesu Kerisoe puyo toitoi ya utemina. Tauna yai guyauemi da taurauguguya veredima ya utemina, be taumi ami kataima ya morabana. ⁶ Koya kita, boni è riuemina da Keriso uma yabedima aubaimima e voiedina. ⁷ Tauna Arua puyonama matabudi ya utemina, be yodi taumi nuatauġa koi rabana naumeiki da Yesu Keriso dà Badama e verau munaġana. ⁸ Tauna e kawa rewapanimi da ami waisumaġe nam ko beku, be na raġanie

tokare nam aitau teneteneğina da ei wavumi.
⁹ Mamaitua tauna patupatutunama, be ya vinemi
 da taumi natunama dà Badama Yesu Keriso mate
 koi rawateğeimina.

Dariğā ekalesia nopone

¹⁰ Yau bana, dà Badama Yesu isane yà riuriu vavasağemina da nam taumiğā koi kawa riuriu. Taumi sibo koyai anina tenağā da nuenuemima be ami noğotama sibo koyai tenağedina, be nam sibo koya dariğā munağemi. ¹¹ Banaga ġesaudima Kloi na vadae miemienidima ai vari-guna da taumi kowai kawa riuriuna. ¹² Taugu aba yà riuriuemina inam uma: “Gesaumima ko riuriuna, “Taugu Pol yàwai muriwatanena”; be ġesaumima, “Taugu Apolos yàwai muriwatanena”; be ġesaumima, “Taugu Pita* yàwai muriwatanena”; be ġesaumima, “Taugu Keriso yàwai muriwatenena”. Taumi inam aba kowai tubuğī?
¹³ Keriso nama ya dariğā munağe, bo? Pol tauna vutuna aubaimima a tuparatu, bo? Taumi Pol isane koya babataito, bo? ¹⁴ Taugu èi nuavere da nam aitau ei babataitona, be Gaiyas da Krisipas taudiğā èi babataitodina, ¹⁵ be nam aitau tenağā dobudi kwa riuna da taugu isague kuya babataito. ¹⁶ O riukaua, taugu yodi è noğotina da Stepen be na vadama banegidima mate èi babataitodina. Be uma taudi muridie nam aitau e noğotina da èi babataitona, ibewa.

Korosi varinama

* **1:12:** Gurik bonane ya riuna: Kepas

17 Keriso nam waibabataito aubainama i riuporeguna, ibewa da vari verenama rauguguyename aubainama. Be taugu nam nuauyauya banegidima maika yau rauguguye yà gwayemi. Ibewa, nam i vere da taugu banaga yà gwayedi be tai sumaǵegu, ibewa be taudi korosi varinama verenama vutuna sibo ai sumaǵena, baninama vari verenama inam yai rewapana vavasaǵana. **18** Be katai banegidima ǵarodie korosi varinama kitama maika kabe giu yababayaba. Be tauda Mamaitua yai yawasanidana, tauda tè kataienai da uma varinama inam Mamaitua na rewapanama ewai maǵatarina. **19** Be girugiruminama poranama umanama ya riuna,

“Taugu tokare banaga adi nuauyauyama yà kawa gewegewedi,
be adi kataima mate taugu yà vayaǵotidina be tai kavena.”

20 Ko kita, raǵon matabuna katai be nuauyauya banegidima Mamaitua na kedama tauwane-nama, taudi yodi deǵo? Mamaitua ya voie da taudi adi nuauyauyama ya kawa buedina, **21** vutuna aubainama taudi adi nuauyauyae nam Mamaitua ti banavina. Avedi da vari verenama kitanama maika wainua buabuanama, Mamaitua ya voie da banaga vari verenama a rauguguyena, be dobudine aitaúga awai sumaǵana, taudi yawasana a banavina. **22** Jius banegidima taudi mataira kitanama ta ǵoeǵoena, be eteni banegidima nuauyauya ta wanewanena, **23** be tauda Keriso tupatuparatunama tà rarauguguyena. Vutuna aubainama Jius taudi nuedima tawai medina, be eteni banegidima ta

nōgoñōgotina da tauda kabe tè buabua. ²⁴ Be tauda Jius be eteni banegidama aitaugā Mamaitua ya yokoyokoedana tauda Kerisoe, Mamaitua na rewapana be na nuauyauyama tè kataieno. Baninama Kerisoe tauda Mamaitua tè banavina. ²⁵ Mamaitua na kedama kitedima maika kabe wainua buebuedi, be yāgoro tauda āgarode na kataima ya sāga vavasāgana. Be avedi da Mamaitua na rewapanama kitnama kabe vogwāgegwāgedi, be yāgoro tauna yai rewapana vavasāgana, nam banaga adi rewapapanama maika.

Mamaitua nema banaga e vinevinedi

²⁶ Yau bana, ko kita munāgemi, taumi aitaugā Mamaitua ya yokoyokoemina. Banaga matedie taumi nopomie nam banaga toitoi katakataidi, bo banaga dosidi, bo aitau waiguyaue tubutubūgina. ²⁷ Mamaitua banaga buebuedima ya vinedina da katai banegidima ei tunimayāgidina, be kamai banabanaga ya vinedina da waibada dosidima banegidima ei tunimayāgidina. ²⁸ Be kitatuāgai banegidima Mamaitua ya vinedina da banaga dosidima e kawa gewegewedina. ²⁹ Mamaitua nama ya voiana, baninama tauna nōgone nam aitau e kawa sāge munāgena.

³⁰ Mamaitua ya voiemi da taumi Yesu Kerisoe ko miamiana. Taune nuauyauya tè banavina, baninama taune Mamaitua ya kawa didimanida, ya kawa babauda be yai yawasanidana. ³¹ Vutuna aubainama girugiruminama e riuria, nama tà voiana:

“Nam aitau taunāga e kawa sāge munāge,

ibewa be Bada tauna e kawa saġena yaba matabuna aubainama.”

2

Keriso tupatuparatumana varinama

¹ Yau bana, raġanine taugu ġaromie è tavana, taugu nam gwaya giudima be nuauyeuyedima e ragaudi be ġaromie Mamaitua varinama e rau-guguyena. ² Ibewa, be yau ogama è tarägħina da Keriso tupatuparatunama, taunaġa sibo è rau-guguyena. ³ Be raġanine taugu taumi ġaromie mate, taugu ma nairigu be ma gusugusug. ⁴ Be vari è rarau guguyena, nam nuauyauya banegidima maika è rarau guguyana da sibo è gwayemi. Ibewa da taugu Arua Babau na rewapanama ġaromie èi maġatarina. ⁵ Baninama taugu yà ġoegoena da ami waisumaġġama Mamaitua na rewapanae e tubuġħana, be nam taugu yau nuauyauya.

Arua na nuauyauyama

⁶ Tauwai sumāġa aitaūġa adi noġotama bagibginama taudi a kataiena da yau giuma nopone inam Mamaitua na nuauyauyama ya moġavuna, be nam uma dobunama na nuauyauya, bo dobu babadidima adi nuauyauya, ibewa. Taudi tokare matabudi ta nuayaġotana. ⁷ Mamaitua na nuauyauyama taugu yà rauguguyena. Muriġa da Mamaitua dobu ya voiena, tauna na ogama ya tarägħina da tokare tauna na waiguyauma e dariġedana. Be uma oġanama bonidego be semosemoe ya kenakenana. ⁸ Dobu babadidima matabudi Mamaitua na nuauyauyama nam ti

kataienā, be deḡoda ti kataienā, tokare nam sibo neneḡara Badanama a tuparatu. ⁹ Be taudi nam ti kataienā, baninama girugiruminama porane e riuriuna nama,

“Mamaitua yaba veredima ya vokaukauedina,
taudi aitaugā tauna tauwai nuapaḡoenama
aubaidima.

Be uma yabedima nam airaḡan aitau i kita bo i
vaiena.

Be nam aitau yabanama i nu-
anoḡonogotena.”

¹⁰ Be tauda ġarode uma yabedima Arue Mamaitua yai maḡataridina, baninama Arua Babau tauna Mamaitua na noḡotama semosemodima matabudi ya kataiedina. ¹¹ Inam kauinama teneḡinama nama banaga. Nam aitau banaga nophonama ima katakataienā, ibewa da banaga na aruama taunaḡa. Be inam kauinama teneḡine nama Mamaitua. Nam aitau Mamaitua nophonama ima katakataienā, ibewa da Aruinama taunaḡa. ¹² Be tauda aba Mamaitua e uteutedana tokare tà kataiedina, baninama tauna Aruinama ya utedana aubainama be nam dobu aruine. ¹³ Vutuna aubainama nam banaga adi nuauyauyae kama rarauguguyana, ibewa da Mamaitua Aruinama aba ewai kataiemaina, nama Arua na riukauama ka rarauguguyena. ¹⁴ Banaga aitaugā ġarodie nam Arua Babau, taudi yaba Mamaitua Aruinama ġarone be ta yovoyovona, taudi nam timawai aninedina, baninama taudi ġarodie anikitanama kabe yaba wainua buebuedi, vutuna aubainama nam tima katakataiedina. Mamaitua na kauama matabudi

Arue sibo tè kita wairuvedina. ¹⁵ Banaga aitau nopone Arua Babau e miamiana, tauna tokare banaga be yaba matabudi e kita wairuvedina, be nam ai banaga teneteneğina da tauna ta kita wairuva.

¹⁶ “Aitau Bada na noğotama ya kataie da tauna sibo Bada ya raukure?”

Be Keriso na noğotama Arue tauda tè pağona.

3

Tauwai sumağɑ adi noğotama yağoro nam i porana

¹ Yau bana, taugu noğone è tavana, taugu nam e giuemina maika Arua banegidima ġarodie è giugiuna nama, ibewa da yau giuma maika dobu banegidima ġarodie, baninama Kerisoe taumi yağoro wawaimima. ² Vutuna aubainama susu* è utemina, be nam kani badobadonama e utemina, baninama taumi nam teneteneğimi. Be yodi taumi yağoro ami noğotama nam teneteneğina. ³ Taumi yağoro dobu banegidima maika, baninama taumi yağoro nopomima unura be waikawa riuriu ya moğavuna. Taumi ko miamiana kitemima maika kabe banaga ġoma. ⁴ Değoda waria kwa riuna, “Taugu Pol yàwai muriwatanena”, be waria kwa riuna, “Taugu Apolos yàwai muriwatanena”, inam kauine taumi ko voivoiana maika kabe banaga yababayababa.

⁵ Naumeki da yodi Apolos tauna aitau? Be Pol tauna aitau? Tauma taunoya ġoma. Tauma kè

* **3:2:** ‘Susu’ be ‘kani badobadonama’ inam waikatakatai.

kaisagumi da taumi kowai sumāgāna. Tauma tenatenağāga ama noyama aba Bada ya riuriuemaina nama ka voivoiedina. ⁶ Taugu pesi è kumana, be Apolos tauna pesi yai kutuvina, be Mamaitua yai gogona. ⁷ Vutuna aubainama aitau da taukuma be tauwai kutuva, taudi inam nam aiyaba, be Mamaitua tauna pesi tauwai gogonama, tauna vutuna inam kaua dosinama. ⁸ Taukuma be tauwai kutuva taudi ta noya tenağāna da adi noyama votanama e tubuğāna, be tokare adi noyama na ruvae nama adi mae-sama ta pağona. ⁹ Naumeki da tauma yodi Mamaitua na taunoyama. Be taumi Mamaitua na sipi, be you na vadama.

¹⁰ Mamaitua na raukiviveree kamda noyanama ya uteuteguna da taugu Mamaitua na tuatuama yeku èi midiridina, be banaga ġesaudima uma yekunama debane vada a keridina. Be tauda matabuda sibo tè kita kaue da nema sibo vada tè keri bakedina. ¹¹ Be Mamaitua na yekuma inam Yesu Keriso. Vutuna aubainama nam aitau teneteneğina da yeku ġesaudima ei midiridi eklesia kerinama aubainama. ¹² Be yodi tauwai sumāgā tabu be tabu uma yekunama debane Mamaitua na vadama a kerina. Ġesaudima adi rauvada kerima purepuredima inam gold, siruva be yeku waimatakanikanidima. Be ġesaudima adi rauvada kerima purepuredima inam kai, mui pokidima be reġi. ¹³ Be Bada na rağānie tokare uma noyedima adi verema tà kitedina. Dobudine Mamaitua adi noyama kai karakaratine e rau-rubudina, be banaga tenatenağāga adi noyama na verema e kitedina. ¹⁴ Be değoda aitau na

vadama kai nam e kara goru, tauna tokare na maesama e paǵona. ¹⁵ Be aitau na vadama kai e kara goruna, naumeki da na noyama matabuna ya kovina. Tauna kabe kai menane be i tavatava, taunaǵa tokare e yawasanana be na noyama matabuna kai e kara goruna.

¹⁶ Koya kataie bo ibewa da taumi Mamaitua na vadama, be Aruinama taumi nopomie e mi-amiana? ¹⁷ Be aitau da Mamaitua na vadanama e kawa gewagewana, Mamaitua tauna mate e kawa gewagewana. Baninama Mamaitua na vadama inam babaunama, be inam vadanama vutuna taumi.

Mara nuauyauyana be dobu nuauyauyanama†

¹⁸ Nam koi kaikaiyovu munaǵemi! Deǵoda tam aitau kwa noǵonoǵotina da banaga matedie tam nuauyauya banegimma. Naumeki da tam sibo banaga matedie kuya voia munaǵem da tam kabe buabuam, yodibe Mamaitua matane tam tokare nuauyauya banegimma kwa tubuǵana. ¹⁹ Baninama Mamaitua matane banaga adi nuauyauyama inam ya bua kauana. Maika girugiruminama porane ya riuna umanama, “Mamaitua taudi adi nuauyauya ya tikonidi be a bekuna”;

²⁰ be,

“Bada banaga adi noǵotama ya kataiedina da taudi a bua kauana.”

† 3:17: Vers 18-23 nōpone ‘dōbu nuauyauyanama’ inam banaga aitauǵa dobu na ġoanama kauidima tauvoiedina. Maika soi, bo maika boita taurauduneedima, bo maika vaivai tauwai tarapiriedima, be nama dobu kauidima ġesaudima mate.

²¹ Vutuna aubainama banaga ami nuauuyauyama aubainama nam ko seğara munağemi, avedi! Yaba matabudi inam taumi ġaromima. ²² Avedi da Pol bo Apolos bo Pita bo dobu bo yawasana bo guri bo yaba yodi ta tubutubuğana bo tokare ta tubuğana, matabudi inam taumi ġaromima, ²³ be taumi inam Keriso ġaroğaronama, be Keriso tauna Mamaitua ġaronama.

4

Bada taunağā apasol e kitakita wairuvedina

¹ Taumi sibo koya kitamaina maika Keriso na taunoyama. Tauna ya birimai da Mamaitua na riukauama semosemodima taurabedima. ² Tauma tauwai rabaraba. Vutuna aubainama sibo kèi patutu kauana. ³ Be değoda taumi ko etaregu bo banaga ġesaudima ta etaetareguna, inam nam ama siesievina. Be taugu mate nam ama etaetara munağeguna. ⁴ Be avedi da yau noğotama didimaninama, be yağoro tokare Mamaitua e kita wairuvaguna da taugu naumeki bo ibewa.

⁵ Vutuna aubainama nam ko etara dokadoka, be koi raba da Bada na kaba verauma rağaninama e tavana. Rağanine Bada e dobina, tauna yaba matabudi waikupikupie kenekenedima e rawayanedi be banaga matabudi ta kitana, da banaga tenatenağāğā nuanama nophonama nema maika kitana. Yodibe banaga matabuna ta kataie da aba aubainama tauda Bada na noyama tē voivoie. Dobudine Mamaitua tauda tenatenağāğā dà noyama na ruvae nama e kawa sağedana.

⁶ Yau bana, taugu yà ñoeñgoena da ami noñote yà sagumina. Vutuna aubainama taugu inam giunama Apolos be taugu tunimaie è boruna da taumi tauma rabui ko noñotimai, be buka aba e riuriuena, nama koi muriwatanena. Vutuna aubainama taumi nam banaga tenaña isanama ko kawa sañe be ñesäunama isanama ko boru waiyovoñe. ⁷ Yau bana, nemanama? Tam aitau ya voiem da banaga dosimma kabe ku miamia? Tam yaba matabuna Mamaitua ñorone kuya pañona. Be aba aubainama yodi kwa voivoiena da kabe tam mabime ku pañopao?

⁸ Taumi ko noñonoñotina da Arua na puyoma matabudi kabe kaite koya ragaudi? Taumiña agunai Mamaitua matane koyai guyauna, be tauma ibewa. Taugu yà ñoeñgoena da taumi sibo koyai rawaguyau, yodibe tauma mate sibo kèi rawaguyauna. ⁹ Anikitanama taugu ñarogue, tauma apasol Mamaitua ya voiemainda tauma kabe kamai banabanaga. Anea be banaga matabudi ta kitamai be ta riuriuemaina da tauma gurigurimaima.

¹⁰ Taumiña banaga nuanuauyauyemima be Keriso kana taiye tauma banaga buabuamaima. Taumi ami waisumañama agunai yai rewapania kauana, be tauma ama waisumañama ya gwañana, bo? Banaga taumi ta viviviviremina be tauma ta kitakita tuañaiemaina. ¹¹ Rañan toitoi tauma kani e karakaratimai, nuamaima e ñasañgasara, ama garama ta gewagewa, banaga ta riñariña vireviremina. Nam ama kaba miama dego, ¹² be rañan matabuna nimamaie ka noyanoya gurata da aba ka banabanavina. Rañanine

banaga ta kunukunuremaina, tauma waiaiaina ka uteutedina, be rağanine banaga ta raraukivi gewegewemaina, tauma ka kenakena porena. ¹³ Rağanine banaga tawai menemaina, tauma giu veredie taudi mate ka giugiuna. Tauma maika uma dobunama na yoğiyögima, be banaga mate-die tauma maika mui.

¹⁴ Taugu uma yabedima yà girugirumidina nam sibo yà voiemi da ko tunimayağɑ, ibewa! Taugu yà girugirumana taumi nuemima yà boruna, baninama taumi taugu yau seda yağama aubainama. ¹⁵ Avedi da taumi taurabemima 10 tausand nama, be tametamemima nam ti toina. Be taugu rağanine vari verenama ġaromie è rarauguguyena, inam rağanine Yesu Kerisoe taugu taumi tamemima è tubuğana. ¹⁶ Vutuna aubainama yà riuriu vavasağemina da taumi taugu koi tupotupoğaneguna.

¹⁷ Inam vutudi aubaidima taugu natuguma Timoti, nuaguma taupağonāma, è riuporena ġaromie. Tauna patutu baneginama Bada ġarone be tauna taugu yau yawasana matabuna Yesu Kerisoe ei kataimina, inam vutuna ekalesia matabudi nopolide è rarauguguyedina.

¹⁸ Taumi ġesaumima ko rarauguguyau be ko noğonoğotina da taugu nam kabe ġaromie yà tava. ¹⁹ Ibewa, değoda Bada e ġoena nama, taugu rağan ġaubonağɑ taumi ġaromie yà tavana. Yodibe taugu rauguyaguyau banegidima yà kitedina da taudi ġarodie rewapanamate bo ta giugiu yabayababa. ²⁰ Baninama Mamaitua na waiguyauma inam nam giu taunağɑ. Ibewa da rewapanamate. ²¹ Yodi taumi aba ko ġoeğoe?

Taugu yà verau be yà kovoğimi, bo wainuapa gó
be voya góta mate yà verau?

5

Waikawa badara ekalesia nopone

¹ Taugu varimima è vaiena da taumi nopolomie banaga tena góga e góra góra. Taugóma tena góga na kavarama mate tawai kawa badarana. Inam kauinama ya gewagewa vavasa góra, eteni banegidima nam nama tima voivoiana. ² Be taumi ya góro ko rarau guyaguyau, bo? Taumi inam kauinama aubainama sibo koyai nuaboya kaua, be inam tau góminama sibo ekalesiae be koya boru dobi góna.

³ Avedi da taugu nam tubu góe góromie be Arue taugu taumi mate be kaite uma tau góminama è etarena. ⁴ Ra góanine taumi dà Badama Yesu isane kowai rawate góie, taugu Arue taumi mate be dà Badama Yesu na rewapanama mate poude, ⁵ dobudine inam tau góminama Seitan nimane ko boru da Seitan tauna tubu góinama e kawa gewagewana. Be Bada na ra góanie Mamaitua inam tau góminama aruinama tokare agunai ei yawasanina.

⁶ Inam kauinama aubainama nam i verena da taumi sibo koya rauguyaguyau. Koya kataie bo ibewa da yist góaubonama tokare buredi matabuna e sasanana? ⁷ Vutuna aubainama yist ko kaipore da taumi maika buredi góma ko mi ana, be nam yist mate. Ko no góti da Keriso tauna Na gópore puyonama, be tauna taumi góromie ya gurina da yodi taumi inam maika buredi góma, nam yist mate. ⁸ Vutuna aubainama yist

matabuna ko kaiporena, inam vutuna gewagewa be mira. Be ko miana waipatutu be riukaua banegidima maika.

⁹ Taugu è girumana taumi ġaromie da ġera banegidima nam sibo mate koyai popo. ¹⁰ Taugu yodi nam eteni banegidima ama giugiuēdina, ibewa. Avedi da taudi ta ġeraġera, tawai gogo, ta danedanene bo kokoitau ta raraū duneedina. Deġoda nama sibo è riuemina, taumi tokare uma dobunama sibo koya dobi porena. ¹¹ Ibewa, be aitaugħa ta riuriu munaġedina da taudi Keriso tauwai sumāġenāma, be yaġoro taudi ta ġeraġera, tawai gogo, kokoitau ta raraū duneedi, tawai mena, ta tegotego bua bo ta danedanenena, taudi vutudi nam taumi mate sibo koyai popo bo nam mate koya kani gogona.

¹² Tauda eteni banegidima nam sibo tè kita wairuvedi, be ekalesia banegidima taudi sibo tè kita wairuvedina. ¹³ Mamaitua taunaġħa eteni banegidima e etaredina. Be inam tauġomināma ġeraġeranāma inam taumi ami noyama da ko etare be ko boru dobiġena.

6

*Tauwai sumāġħa nam sibo adi banagama
ġesaudima a etaredi*

¹ Deġoda taumi aitaugħa turamma turamma ġarone piripiri e kenakenana, taumi sibo tauwai sumāġħa ġesaudima ġarodie koya naġo da taudi ai tara piriemina. Be gewagewa tauwai tarapirienāma nam waiwaisumeġina ġarone nam ko naġo da ei tarapiriemi. ² Koya kataie bo

ibewa da taumi Mamaitua na damma tokare dobu matabuna ko etarena? Be yodi taumi nam teneteneğina da piripiri ġauġaubodima sibo ġaromie koyai tarapiriedi, bo? ³ Ko noġoti da tauda tokare anea tà etaredina! Vutuna aubainama taumi mate piripiri ġauġaubodima ġaromie, sibo koya kawa didimanidina. ⁴ Be yodi deġoda turamma turamma ġarone piripiri e kenakenana, aba aubainama banaga nam waiwaisumegħima ko vinevinċedina da taudi sibo a etaremina? Inam kauinama nam i verena, baninama taudi nam ekalesiae tima miamiana. ⁵ Uma kauinama aubainama taumi sibo koya tunimayaġħa, baninama taumi nopomie nam aitau tenaġħa teneteneğina, da tauna tokare tauwai sumaġħa ei tara piriedi. ⁶ Aba aubainama taumi tauwai sumaġħa taumiġħa ko etaetara mu-naġġemi? Be aba aubainama uma kauinama eteni banegidima noġodie ko voivoiedi? Inam kauinama ya gewagewa kauana.

⁷ Taumi ko etaetara munaġġemina, uma kauinama ewai maġġotra da ami waisumagi kaite koya bekuna. Raġanine banaga gewagewa ta voivoiena ġaromie, taumi tokare nam koya dami pore? Bo deġoda banaga ta kaikaiyovu emina, taumi tokare nam koya vaiā pore? ⁸ Be avedi da taumi tauwai sumaġħa, be taumi yaġoro ko kawakawa gewegewemi, be kowai kaikaiyovu munaġġemina.

⁹ Ko noġoti da banaga gewagewa tauvoienama taudi tokare nam Mamaitua na waiguyauma no-pone ta saġħa. Nam koi kaikaiyovu munaġġemi! Deġoda banaga ta badabadara, kokoitau ta ra-

rau duneedi, ta ġeraġera, bo deġoda tautauġoma taudiġa tawai kawa soġa, bo waiwaiivi taudiġa tawai kawa soġa, ¹⁰ bo taudanedanene, tauwai gogo, tautegotegobua, tauwai mena bo tauwai kaikaiyovu, uma banegidima matabudi tokare nam Mamaitua na waiguyauma nopone ta saġa. ¹¹ Be noġone ġesaumima uma kauidima nama koya voivoiedina. Be yodi taumi Yesu Keriso kosinine ya koġemina, be Arua Babau nopomie e miamiana. Vutuna aubainama Mamaitua yodi yai aninemina.

Tubuġidama inam Arua Babau na vadama

¹² Banaga ġesaudima ta riuriuna umanama: “Yaba matabuna Bada nam imawai ġakedina, taugu ġarogue teneteneġinama da aiyaba ya voiena.” Inam riukaua, be nam yaba matabudi tokare ta sagumi da ko mia kaua. Taugu teneteneġinama da uma yabedima matabudi ya voiedina, be taugu nam ama ġoegħoena da uma yabedima tai badegu. ¹³ “Kani inam kapo aubainama, be kapo inam kani aubainama”. Inam riukaua, be Mamaitua inam taudi tokare e kawa gewgewedina. Be badara inam kaua ġesau. Tubuġidama inam nam badara aubaina, ibewa! Tubuġidama inam Bada na noyama aubainama, be Bada tubuġidama ewai badena. ¹⁴ Mamaitua na rewapanae tauna Bada Yesu gurie be ya kawa midisuġu munaġena, aubainama tauna tokare tauda mate e kawa midisuġu munaġedana. ¹⁵ Ko noġoti da tubuġimima inam Keriso ragaraganama. Vutuna aubainama nam airaġġan taubadabdar mate koi

rawategei, baninama tubugimima inam Keriso ragaraganama. ¹⁶ Taumi koya kataie bo ibewa da banaga aitau tubuginama taubadabadar mate tai rawategeidina, inam yodi tubuge taudi tenaga. Baninama girugiruminama poranama umanama e riuriuna, “Taudi rabuidi tokare tubuge tenaga.” ¹⁷ Be aitauga Bada mate ta rawategeidina, taudi tokare Arue tenaga.

¹⁸ Vutuna aubainama badara, naumeiki da ko gose pore! Gewagewa gidoindima taudi gavoe ta kenakenana, be yagoro gewagewa. Be badara inam tubugimie kenakenana, aubainama tubugimima ko kawakawa mira vavasaena. ¹⁹ Tubugimima inam Arua Babau na vadama. Mamaitua tauna Arua ya utemina, be yodi inam Aruinama nopomie e miamiana. Taumi nam mabimie komawai bademina. ²⁰ Taumi maesimima ya moraba kauana, be Yesu Kersio ya gimerimina. Vutuna aubainama tubugimie Mamaitua ko vivirena.

7

Naagi na kauama

¹ Taumi letae aba koya riuriueguna, vutuna yodi ya paribeemina:

Inam ya verena degoda banaga nam tai naagi.
² Be baninama badara yababayaba kana taiye, naumeiki da taugomma sibo mabine na waivima ya naagina, be waivi sibo mabine na taugomama ya naagina.

³ Be taugomma sibo naagi na yawasanae na waivima garone ya miana, be waivi sibo naagi na yawasanae na taugomama sibo garone ya miana.

⁴ Waivi tubuğinama nam taunağɑ imawai badena, ibewa da tauğoma ewai badena. Be teneğinama nama tauğoma, tubuğinama nam taunağɑ imawai badena, ibewa da waivi ewai badena. ⁵ Nam tamğɑ kwa taudidi munağem! Be değoda koi anina munağemina, naumeki da dobudine rağan ġaubonağɑ ko taumiana, moiragi aubainama. Be murine koi rawategei munağemina da Seitan ami gwağae nam e raurubumi, be taumi tokare nam badare ko beku. ⁶ Uma kauinama nama ya riuriuemina, inam sagumima aubainama. Be inam nam Bada na riuvavasağɑ, ibewa. ⁷ Taugu ya noğonogötina da banaga matabudi sibo maika taugu, be banaga tenatenağɑğɑ adi puyoma tabu be tabu Mamaitua ya utedina.

⁸ Be aitaugɑ da kaiyababa bo nam wainağidi, taudi inam ya verena da nam sibo ai naği, be taudi sibo a mia ġomana maika taugu. ⁹ Be aitaugɑ da adi noğotama e vovo gwağagwağana, naumeki da tai nağina. Baninama ya verena da taudi tai nağina be nam badara nuedima e raupotipotie.

¹⁰ Be naği banegidima aubaidima inam Bada na riuvavasağama ya riuriuedina: Waivi na badama nam sibo ya gose. ¹¹ Be değoda tauna na tauğomama kaite ya gosena, naumeki da nama sibo ya miana, be nam sibo tauğoma ġidoi ya naği munağe. Be ya verena da na tauğomama mate sibo ai nuavere munağɑ be a mia tenağana. Be teneğinama nama tauğoma na waivima nam sibo ya gose.

¹² Be avedi da Bada uma kauinama nam i giuena, be yağoro ġesaumima taugu yodi ya ri-

uemina umanama: Değoda aitau tauwai sumāga na waivima nam tauwai sumāga, be tauna yağoro e ġoegoena da na badama mate sibo a mianana, inam naumeki da tauğoma na waivima mate nam tai gosağā. ¹³ Be değoda aitau tauwai sumāga waivinama na tauğomama nam tauwai sumāga, be tauna yağoro e ġoegoena da na waivima mate sibo a mianana, inam naumeki da waivi na tauğomama mate nam tai gosağā. ¹⁴ Be değoda tauğoma nam waisumeğina, tauna yağoro banaga babaunama, baninama na visarama tauna tauwai sumāga aubainama. Be değoda waivi nam waisumeğina, tauna yağoro banaga babau-nama, baninama na tauğomama tauna tauwai sumāga aubainama. Be değoda uma kauinama nama ibewa, ami sedama Mamaitua matane a miramirana, be yodi taudi seda babaudima. ¹⁵ Be değoda nam waisumağā baneginama waigosağā e ġoena, naumeki da e nağō. Değoda uma kauinama nama e tubuğana, dobudine tauwai sumāga tauna nam sibo yai kaikaididi. Mamaitua e ġoegoena da tauda subae tà mianana. ¹⁶ Baninama tam waivi nam ku kataiena da am badama kwai yawasani bo ibewa. Be mate tam tauğoma nam ku kataiena da am visarama kwai yawasani bo ibewa.

Mamaitua ya vinevinemina, ruvane nama ko miana

¹⁷ Tenatenağāğā Mamaitua ya riuriuem, be ami puyoma ya uteutemina, nama ruvane ko miana. Banaga matabuna ekalesia nopodie yà riuriuedina da umanama sibo a voiana. ¹⁸ Aitau da kopitom ya pağona, naumeki da tauna nama

sibo ya miana. Be aitau da kopitom nam i paǵona, naumeki da tauna nama sibo ya miana. ¹⁹ Mamaitua matane kopitom inam nam aba, vutuna aubainama deǵoda banaga kopitom ya paǵo bo ibewa, inam nam aba. Be Mamaitua na riuvavasaǵama sibo tè voteyeteyedina, inam vutuna yaba dosinama.

²⁰ Taumi tenatenaǵaǵa Mamaitua ya vinevinema, nama ko miana. ²¹ Deǵoda Mamaitua ya vinem da tam taunoya yababa, inam naumeki, nam kwai nuaboya. Be deǵoda tam keda kwa wanewanena da tam waitau noyayababa sibo kuya gosena, naumeki da nama kwa voiana. ²² Raǵanine banaga taunoya yababayababa, be Bada ya vinedi da taudi tauna na banagama, inam raǵanine Mamaitua matane taudi nam banaga adi taunoya yababa, ibewa da taudi yodi Keriso na taunoyama. Be teneǵinama nama, aitauǵa nam banaga adi taunoya, be tauna yaǵoro Keriso na taunoyama. ²³ Maesimima ya moraba kauana, be Yesu Kersio ya gimerimina. Vutuna aubainama taumi nam sibo banaga aubaidima koyai taunoya yababayababa. ²⁴ Yau bana, vutuna aubainama taumi tenatenaǵaǵa Mamaitua ya vinevinema, nama ko miana.

Yarayaraga be guguini adi giuma

²⁵ Yarayaraga be guguini aubaidima Bada na waiǵakama nam ǵarogue ima kenakenana da yà riuedi. Be Mamaitua na raukiviveree tauna ya sagugu da taugu banaga waipatutuguma. Vutuna aubainama umanama yà raukuremina: ²⁶ Baninama yodi raǵan piripiridima aubainama,

ya verena da taumi sibo nam koyai naḡi.
²⁷ Deḡoda kaite kuyai naḡina, nam am waivima kwa gose. Be deḡoda nam kui naḡina, naumeki da nam waivi kwa wane. ²⁸ Be deḡoda tam yaraga be kwai naḡina, inam nam gewagewa kuma voivoiena. Be teneḡinama tam guguini be kwai naḡina, inam nam gewagewa kuma voivoiena. Be deḡoda taumi koi naḡina, tokare taumi piripiri ko banavidina. Be taugu yà ḡoeḡoe da uma kauidie yà duḡumina, da uma piripiridima tokare nam ko banavidi.

²⁹ Yau bana, yau giūma baninama umanama: Raḡan kaite e tupotupona. Vutuna aubainama aitaugā kowai naḡina, ko kita kaua da naḡi nam ei bademi. ³⁰ Be aitaugā kowai nuaboyana, ko kita kaua da nuaboya nam ei bademi. Be aitaugā kowai nuaverena, ko kita kaua da nam nuavere ei bademi. Be aitaugā yaba ko gimagine marana, ko kita kaua da inam yabedima nam tai bademi. ³¹ Be aitaugā dobu na ḡoanama ko voivoiedina, ko kita kaua da inam kauidima nam tai bademi. Baninama uma dobunama tokare e samoana. ³² Taugu yà ḡoeḡoena da nam ko kawa nuaraḡeraḡemi. Yaraga tauna Bada na ḡoanama e noḡonoḡotina da nema Bada e noya bake be ya kawa nuaverena. ³³ Be deḡoda tauna ei naḡina, tauna dobu na ḡoanama e noḡonoḡotidina, da nema sibo na visarama e noya bake da na visarama ei nuavere. ³⁴ Be inam raḡanine tokare na noḡotama rabui ta tubuḡana. Be teneḡinama nama guguini, tauna e noḡonoḡotina da nema sibo Bada ya noya bake da Bada ya kawa nuaverena, baninama tauna na yawasanama matabuna

Bada ya utena. Be deḡoda tauna ei naḡina, tauna dobu na ḡoanama e noḡonoḡotidina da nema sibo na tauḡomama ya noya bake da na tauḡomama yai nuaverena.

³⁵ Inam kauidie sagumima aubainama yà riuriuemina, be nam ama waiḡakemina. Taugu yà ḡoeḡoena da taumi yawasana didimanine ko miana, be nam ko noḡota raburabui. ³⁶ Be aitaugoma na ḡoapaparama ḡarone nuanama e rarau potipoti da sibo ya naḡina, inam naumeki da tai naḡina be inam nam gewagewa.

³⁷ Be aitaugoma noponama batuturinama be na ḡoapaparama ḡarone nuanama nam ima raupotipotina da sibo ya naḡi, naumeki da na ogama e taraḡi da tauna tokare nam ei naḡi. Ya verena da taudi nam tai naḡi. ³⁸ Vutuna aubainama deḡoda banaga tai naḡina, inam ya verena, be aitau da nam ei naḡi, o, inam ya vere kauana.

³⁹ Taugu ḡoma tauna na waivima e panipanina. Be deḡoda tauḡoma e gurina, yodibe kaiyababa tauna na ḡoanama nama tauḡominama ei naḡi. Be tauna sibo tauḡoma waisumeḡinama ya naḡina. ⁴⁰ Be taugu è noḡotina da kaiyababa nama sibo ya mia yababana, tauna tokare yai nuavere kauana. Be taugu mate yà noḡonoḡotina da Mamaitua Aruinama nama ya riueguna.

8

Boita kanidima tà kanidi bo ibewa?

¹ Yodi musara kokoitauuteutenama, vutuna na kauama yà paribeemina: Matabuda tè kataiena da kokoitau nam ti rewapanana. Be uma

katainama ya voiemina da taumi ko rarauguyagua. Be rauguyaguyau tokare nam e sagumi, ibewa! Be ami banagama sibo koyai nuapaǵoedina, inam wainuapaǵone tokare ekale-sia banegidima ko sagudina. ² Banaga aitau e noǵonogotina da tauna yaba matabuna ya kataiedina, inam baneginama tauna Mamaitua matane na kaitaima nam teneteneǵina. ³ Deǵoda banaga Mamaitua nuanama e paǵona, inam baneginama vutuna Mamaitua ewai aninena.

⁴ Be yodi nemanama? Inam naumeki bo ibewa da kokoitau museridima tà kanidi? Tauda tè kataienan da dobu kokoitaudima taudi nam Mamaitua, baninama Mamaitua tauna tenaǵa, be tauna vutuna Mamaitua riuriukauinama.

⁵ Taugu è kataienan da gunume be dobue arua gewegewedima ta riuriu munaǵedina da taudi kabe mamaitua. Be avedi da uma mamaituedi bo babadidima toitoi dobue ta miamiana, ⁶ be tauda yaǵoro tè kataienan da Mamaitua riuriukauinama tauna tenaǵa, tauna vutuna tawai sumage be tawai muriwatanena. Be tauna vutuna Tamadama, be pakane yaba matabudi taune da a tubuǵana, be taune da tauda yodi tà miamiana. Be dà Badama tenaǵa e miamiana, tauna Yesu Keriso. Be tauna vutuna yaba matabudi ya voiedi be tauna dà yawasanama ewai badena.

⁷ Be uma kauidima banaga ǵesaudima nam ti kataienan. Taudi boni kokoitau awai muriwatanedina. Vutuna aubainama yodi deǵoda taudi kokoitau museridima ta kanikanidi be ta noǵonogota bekubeku, be noǵotabekubeku e voiedi da adi noǵotama e vovo gwaǵagwaǵana, vutuna aubainama taudi Mamaitua matane a

mirana. ⁸ Be Mamaitua nam kani kana taiye imawai aninedana. Vutuna aubainama deḡoda tauda kokoitau museridima tà kanidi bo ibewa, inam kauidima nam timawai badana da tauda banaga vereda bo ibewa.

⁹ Be kwa kita kaua da nam am waisumaḡama kana taiye anibeku kediedie turamma kwa voie da na waisumaḡe e beku. ¹⁰ Baninama deḡoda turamma aitau na noḡotama vovogwaḡagwaḡanama, be ya kitam da tam kokoitau museridima kwa kanikanidina, agunai tauna tokare mate kokoitau museridima e kanidina, ¹¹ be dabudine tauna tokare e noḡota bekubekuna. Baninama tam am waisumaḡama wairewapaninama aubainama, tam tauna na waisumaḡama kuya kawa gewagewana. Be kwa noḡoti da tauna mate aubainama Keriso ya gurina. ¹² Deḡoda tam turamma nama nuanama kwa kawa miramira be na noḡotama kwa kawa gewagewana, tam Keriso ġarone mate gewagewa kwa voivoiena. ¹³ Vutuna aubainama deḡoda aba kaninama taugu è kanikani be turaguma è voie da na waisumaḡe ya bekuna, naumeki da inam muserinama nam yà kani munāge. Inam raḡanine turaguma na waisumaḡe nam e beku.

9

Pol na noyama aubainama maesa nam i ḡoena

¹ Taugu riukaua apasol, be nam aitau dobue imawai badeguna! Taugu dà Badama Yesu mataḡomigue è kitana. Be taugu yau noyama na bانيا inam yodi taumi Bada kowai sumaḡena.

² Be avedi da banaga ḡesaudima ġarodie taugu

nam apasol, be taumi ġaromie inam taugu apasol, baninama taumi taugu yau matamatama.

³ Aitauġa yau noyama ta paripari virevirena, taudi ġarodie umanama yà riuriuna: ⁴ Tauma nam ka kani be ka tego, bo? ⁵ Tauma ama vaġiae nam waisumaġa waivinama ka naġi be mate ka naġo, maika apasol ġesaudima nama, bo? Bada tasitasinama be Pita nama a voiana. ⁶ Taumi apasol ġesaudima ko sagusagudina, be taugu be Banabas taumaġa yodi ama yawasanama aubainama ka noya munaġemai, bo? ⁷ Ko noġoti da nam airaġan tauīgara taunaġa na manee iġara pure-puredima i gimarana. Be nam aitau sipi e kuma be kaninama tokare e tuaġiae. Be nam aitau musara e yosidi be kanidima tokare e tuaġiedi. ⁸⁻⁹ Be uma kauidima matabudi nam ama giugiu yababedina, ibewa da Mousis na tarawatuma e riuriuna nama, “Kau kaikaivainama ami noyama e voivoiena raġanine, nam mudunama ko pantom, ko gose da tauna e kanina.” Ko noġoti da Mamaitua kau yai nuaboyedi be nama ya riu, bo? ¹⁰ Ibewa da tauda banaga e giugiuedana. Aitau na sipima ya kumana tauna e noġonogotina da tokare kani e kanina.

¹¹ Be tauma pesi Arue nopomie kè kumana da taumi yodi tauwai sumaġa. Vutuna aubainama taumi sibo tauma yodi gara be kani sibo koya sagumaina. ¹² Taumi banaga ġesaudima ġaromie a rarauguguyana ko sagusagudina, be aba aubainama tauma nam koma sagusagumai? Taumi sibo tauma koya sagusagu kauemainā, baninama tauma ami ekalesiama pakanama kēi karena. Be tauma nam airaġan kamawai

bağmina da taumi sibo koya sagumai. Ibewa da rağan matabuna tauma ama ġoanama kè dami poredina, baninama nam kama ġoeġoena da Keriso varinama kedanama sibo kè kawa barabara.

¹³ Taumi koya kataie bo ibewa da aitaugā tempol nopone ta noyanoyana, taudi adi kanima tempol nopone ta paġopaġodina. Be pirisi aitaugā olta debane ta puyopuyona, taudi olta puyonama nevanama ta paġona. ¹⁴ Be inam kauinama teñegine nama Bada ya riu vavasaġa da aitaugā vari verenama ta rauguguye be banaga tawai sumaġana, naumeki da tauwai sumaġa sibo tau-rauguguya a sagudina. ¹⁵ Be taugu nam airaġan uma yabedima aubaidima ei baġa rubuemina. Be mate taugu nam uma yabedima ama girugirumidina da taumi sibo taugu ko sagugu, ibewa. Be nuaguma ya verena da nam airaġan ġaromie aba ei baġena. Agunai da taugu noġone yà guri, be muriġa da aiyaba ġaromie yài baġena. ¹⁶ Nam vari verenama rauguguyenama aubainama ama rarauguguyauna. Inam taugu yau noyama. Be vari verenama rauguguyenama yà tuaġaiena, taugu tokare gewagewa yà banavina.

¹⁷ Deġoda tauguġa yau ġoane e rarauguguyauna, naumeki da maesa sibo ē paġona. Be taugu nam yau ġoane ama rarauguguyauna, ibewa da Maitua ya vineguna da noyanama sibo ē voiena. ¹⁸ Yodi yau maesama inam aiyaba? Taugu yau maesama inam vutuna vari verenama yà rarauguguyenena, be nam tokare mane yà paġo.

¹⁹ Vutuna aubainama taugu nam aitaui imawai badegu. Be yaġoro taugu banaga matabudi adi

taunoyama da toitoi sibo è verauğedina Keriso ġarone. ²⁰ Jius banegidima ġarodie taugu è voiegu da maika Jius banegiguma. Be aitauğā Mousis na tarawatuma tawai muriwatenena taudi ġarodie, taugu è voiegu da kabe taugu mate Mousis na tarawatuma ēwai muriwatane, avedi da taugu nam inam tarawatunama tauwai muriwatanena. Be nama yà voivoiana da taudi sibo è verauğedina Keriso ġarone. ²¹ Be eteni banegidima ġarodie, taugu avedi da nam eteni banegigu, be è voia munağegu da taugu kabe eteni banegigu, avedi da taugu tauwai sumağā, be Keriso na tarawatuma tauwai muriwatanena. Inam nama yà voivoiana da taudi sibo è verauğedina Keriso ġarone.

²² Be aitaau adi waisumağama gwağagwağanama, taudi ġarodie taugu è voia munağegu da maika kabe yau waisumağama gwağagwağana da sibo è verauğedina Keriso ġarone. Banaga matabudi ġarodie taugu è voivoia munağeguna maika kabe taudi da sibo toitoi è verauğedina Keriso ġarone. ²³ Vari verenama kana taiye taugu uma yabedima matabudi è voivoiedina, be banaga Bada Yesu tawai sumağena rağanine, taugu yà nuavere kauana.

Reisis ekalesiae wainasinama

²⁴ Ko kataie da reisis nopone tauwai reisis ta manimaninina, be banaga tenağā e tava dokana, tauna tokare maesa e pağona. Vutuna aubainama taumi yodi ko manini gurata da tokare maesa ko pağona. ²⁵ Tauwai reisis matabudi taudi yaba ġesaudima ġarodie ta widiwidinedina be tawai prektas guratana da

tokare maesa sibo a paǵona, be inam maesinama tokare e nuayaǵotana. Be tauda dà maesama marae inam kenakena nonoǵinama. ²⁶ Vutuna aubainama taugu nam ama manimanini yababayababana, be nam amawai paipaidena. ²⁷ Ibewa, be taugu kopiguma yà riǵariǵa be yàwai badena, baninama nam ama ǵoeǵoena da taugu banaga ǵesaudima ǵarodie yà rarauguguya be tokare yà beku. Inam tokare Mamaitua yau maesama banaga ǵesauńama e utena.

10

Ko kita kaua da nam raurubu na raǵanie ko beku Israel banegidima maika

¹ Yau bana, bonideǵo dobu kavakavane aba dà dosima ǵarodie ya tubutubuǵana, nam airaǵan nuemima e koa. Mamaitua giyou ya riupore da uma banegidima yai dokedina. Be taudi egasi noponaǵa yai doka nawedina. ² Raǵanine taudi giyou ai muriwatane be egasi noponaǵa a naǵonaǵona, inam raǵanine taudi Mousis isane a babataitonana. Uma babataitonama ewai maǵatárana da taudi inam Mousis na damma. ³ Be Mamaitua mara kaninama ya utedi be matabudi a kanina. ⁴ Be mate Mamaitua yekue mara upanama ya utedi be matabudi a tegona. Be uma yekunama inam Keriso, tauna vutuna mate a naǵonaǵona. ⁵ Be taudi yaǵoro Mamaitua a kawa nuamedimedina, vutuna aubainama taudi dobu kavakavane Mamaitua matabudi yai guri yaraidina.

6 Uma kauidima a tubuġana, inam mataira ewai maġatarina tauda ġarode. Be ewai kataidana da tauda nam sibo gewagewa voiedima tèi nuanoġonogotedi maika taudi a voivoiana nama. **7** Nam kokoitau ko rauduneedi maika taudi. Girugiruminama poranama e riuriuna nama, “Banaga a mia, a kanikani be a tegotegona, be a midisuġu da kokoitau a bigabiga kwavivirona.” **8** Be nam tài kawa badara maika taudi. Be uma kauine raġan tenaġa nopone banaga matabudi 23 tausand a gurina. **9** Nam sibo Bada raurubue tè boru taudi a voiana maika, be mota Israel banegidima toitoi ai guridina. **10** Be nam ko momodu taudi maika, be tauwai guri aneanama yai guridina. **11** Uma kauidima Israel banegidima ġarodie a tubuġana a girumidina, tauda nuadama aniborunama aubainama, da tauda nam uma kauidima yodi raġan damodie sibo tè voiedi.

12 Vutuna aubainama taumi deġo da ko noġonogotina ami waisumaġe ko vava taradidina, naumeki da ko kita kaua da nam ko beku. **13** Raurubu matabudi ko banabanavidina inam raurubu ġoma. Inam raurubudima banaga ġesaudima mate ta banabanavidina. Tokare agunai raurubu ġesaudima ko banavidina. Be nam ko naira, baninama Mamaitua patupatutunama e kitakita watanimina da ami rewapanama na ruvae raurubu ko banavidina. Be mate raurubu raġanine tauna keda ei kataimi da raurubu ko vaisubana, be nam sibo raurubue koya beku.

Kokoitau adi soima be Bada na soima

¹⁴ Vutuna aubainama yau bana, kokoitau ko gose poredi be nam airaġan ko rauduneedi. ¹⁵ Taumi noġota banegimima, aubainama yau giuma aba yà guuemina mayanama ko paġo. ¹⁶ Keyaka ko noġoti. Uma keyekinama Yesu na soie tè tegotegoe be Mamaitua tēwai kaiwena. Be raġanine keyaka tè rarau tegoena, tauda Keriso kosinine tèi rawateġeidana. Be buredi tè givana. Be raġanine tè kanikanina tauda Keriso tubugine tèi rawateġeidana. ¹⁷ Avedi da tauda toitoi, be buredi tenaġa tà kanikanina, vutuna aubainama tauda matabuda tubuġa tenaġa. ¹⁸ Tauda Israel adi kauama tà noġoti. Taudi musara olta debane a gabudi be a kanikanidina, inam raġanine taudi inam oltanama mamaituanama mate awai rawateġeidina.

¹⁹ Taugu nam ama riuriuna da kokoitau bo adi puyoma inam yaba dosina. ²⁰ Ibewa, be ko noġoti da aiyaba eteni banegidima ta rarau puyoedina, inam vutuna taudi penama ġarodie ta puyopuyona, be nam Mamaitua ġarone. Be taugu nam ama ġoegoena da taumi penama mate koi rawateġeimi. ²¹ Nam Mamaitua na keyake be penama adi keyake ko rautego tenaġana. Be mate nam Mamaitua na kani be Seitan na kanima taumi ko kani tenaġedi. Avedi! Uma kauidima Mamaitua nam ima ġoegoedina. ²² Tauda Bada tà rarau rubuna da ġarode sibo ya medi, bo? Tauda dà rewapanama tauna na rewapanama e saġa pore, bo?

Nam taudaġa sagudama tà noġoti, be dà banagama mate sagudima tà noġotina

²³ Yaba matabudi teneteneğinama da tà voiedina, be inam yabedima nam matabudi tokare ta saguda. Be mate yaba matabudi teneteneğinama da tà voiedina, be inam yabedima nam matabudi tokare ta voieda be dà waisumağe tai rewapana. ²⁴ Nam taudağɑ̄ sagu munağgedama tà noğoti, avedi. Be dà banagama mate sagudima tà noğotidina.

²⁵ Musara anikune nopone ta gimagimaredina inam ko kanidina, be nam koi taravira be ko riuna, “Uma kokoitau muserina, bo ibewa?”. ²⁶ Baninama girugiruminama porane umanama ya riuna, “Dobu be nopone yaba matabuna inam Bada ġaronama.”

²⁷ Değoda nam waisumağɑ̄ baneginama kani aubainama e kokonem, be aba kaninama e uteutemna, inam naumeki da kwa kani yababedina be nam kwai taraviravira. ²⁸ Be değoda inam baneginama sibo umanama i riuemna, “Uma muserinama inam kokoitau museridima.” Naumeki da tam uma baneginama ya riuriuemna tauna kana taiye tam musara nam kwa kanidi. ²⁹ Nam i verena da tauna e noğonoğotina da tam kabe gewagewa ku voivoie.

Be yodi aba aubainama banaga ġesaunama na noğotama sibo yai badem? ³⁰ Be tam yodi agunai umanama kwawai noğotana, “Değoda taugu Maimaitua yài kaiwe be yà kanikanina, naumeki da aba aubainama banaga ġesaunama na noğotama sibo èi bade, be nam sibo è kani?” ³¹ Naumeki da am noğotama, baninama yodi yà utemna. Inam baninama yaba matabudi tam kwa voivoiedina, kwa kanikani bo kwa tegotegona, inam

Mamaitua isanama anikaisuğunama aubainama. ³² Vutuna aubainama tam nam turamma kwa voie da na noğote e beku, avedi da tauna Jiu, eteni bo Kuristen baneginama. ³³ Taugu mate nama yà voivoiena. Yà rarau rubu gurata da banaga matabudi yàwai nuaveredina. Taugu nam tauguğā ama sagusagu munağeguna, be banaga ġesaudima mate yà sagusagudina da banaga toitoi tokare Bada Yesu ei yawasanidina.

11

¹ Taugu aba Keriso ya voivoiena yàwai muriwatanena, vutuna aubainama taumi sibo taugu yà voivoiana, nama sibo koyai muriwataneguna.

*Tautaugoma be waiwaivi adi vaivaima
taparoro nōpone**

² Taugu isemima yà kaikai suğuna, baninama taumi rağān matabuna ko noğonogötigu, be yaba matabuna èwai katakataimina taumi kowai muriwatanedina aubainama. ³ Be yodi yaba tenağā yà riuemina: Waivi debanama inam tauğoma, be tauğoma debanama inam Keriso, be Keriso debanama inam Mamaitua.

⁴ Vutuna aubainama degoda tauğoma ma debasumana e moimoiragi bo Mamaitua riunama e giugiuena, tauna Keriso ewai diboğina. ⁵ Be waivi degoda nam ma debasumana be e moimoiragi bo Mamaitua riunama e giugiuena, tauna na tauğomama ewai diboğina, baninama tauna e voivoiana maika kabe tauğoma. Tauna e

* **11:1:** Debasuma inam Gurik banegidima adi vaivaima.

voivoiana kabe waiwaiivi badabadaridima debe-dima makumaku poredima maika. ⁶ Vutuna aubainama deḡoda waivi nam debanama e suma, naumeki da tauna sibo deba vuvuġinama a maku pore be tauna sibo ya tunimayaġāna. Be deḡoda waivi debanama makuporenama e tunimayaġēna, naumeki da tauna sibo debanama ya sumana. ⁷ Be tauġoma tauna nam sibo debanama ya suma, baninama tauna kitanama maika Mamaitua. Be tauġoma tauna Mamaitua na waibadama ewai maġatarina. Be waivi tauna tauġoma na waibadama ewai maġatarina. ⁸ Baninama tauġomae da Mamaitua waivi yai tubuġina, be Mamaitua nam waivie tauġoma i tubuġina. ⁹ Be tauġoma nam waivi sagunama aubainama i tubuġāna, ibewa. Be waivi tauna tauġoma sagunama aubainama ya tubuġāna. ¹⁰ Vutuna aubainama waivi debanama sibo ya sumana. Inam na matairama da tauna na tauġomāna na waibadae e vivivivirena. Uma kauinama anea ta kitakita watanena.

¹¹ Be Keriso matane waivi be tauġoma taudi matabudi teneġidima, be taudi sibo ai kawa sagu vivirana, ¹² baninama avedi da pakane tauġomae da waivi ya tubuġāna, be yodi waivie da tau-tauġoma ta tubutubuġāna. Be taudi matabudi Mamaitua yai tubuġidina.

¹³ Taumiġa mayemima ko paġo munaġena, waivi debanama nam i suma be e moimoiragina, inam ya vere bo ibewa? ¹⁴ Ami vaivaima ko noġoti. Deḡoda tauġoma deba vuvuġinama e dau kauana, inam nam i verena, be kitanama yai tunimayamayaġāna. ¹⁵ Be deḡoda waivi deba

vuvuġinama e dau kauana, inam ya vere kauana, baninama deba vuvuġinama inam maika na debasumama. ¹⁶ Be deġoda aitau uma kauinama aubainama e riuriu viravirana ġarogue, naumeiki da taugu yà riuriuna da tauma be ekalesia ġesaudima mate ama vaivaima inam nama, be nam aba vaivai ġesaunama ġaromiae ima kenakenana.

Turiya na kauama

¹⁷ Be yodi kaua ġesaunama ġaromie yà giuena. Mamaitua matane taumi gewagewa ko voivoiena, raġanine taumi taparoroe kowai rawateġeimina. ¹⁸ Baninama taugu è vaiena da taparoroe koi rawateġeimina raġanine, ko daridariġa munaġemina. Be taugu yà noġonogötina da inam riukaua. ¹⁹ Naumeiki da uma dariġinama ei maġatara da aitaugħa didimana banegidima tà kitedina.

²⁰⁻²¹ Taumi turiya aubainama kowai rawateġeimina raġanine, taumi kani kowai paparanena, be ami banagama nam koma raberabedina. Vutuna aubainama ġesäumima ko kanikani gurata be ko tegotego buana, be ġesäumima ma kanigurimi ko naġonaqona. Inam nam nama turiya na kaua! ²² Uma kauinama nemanama? Taugu isemima yà kaisuġu, bo? Ibewa ġoma! Taumi sibo ami vadae inam nama kaninama koya kanikani be koya tegotegona. Taumi sibo Mamaitua na damma koya viviviviredina, be ami banagama wainuatoitoidima kowai tunimayaġidina, inam nam i verena.

²³ Taugu turiya na kauama Bada yawai kataiguna, vutuna taumi èi kataimina. Inam umanama: Rağanine Judas Bada Yesu ya boruboru dobiġena, inam kupinama tenegine Bada buredi ya paġo, ²⁴ Mamaitua yai kaiwe da ya giva be ya riuna, “Uma inam taugu tubuġiguma taumi aubaimima. Rağanine uma ko kanikanina, taugu aninoġotiguma aubainama. ²⁵ Be kani murine tauna keyaka ya paġo be ya riuna, “Uma inam Mamaitua na waianinama vaunama, kosiniguma e rauġinina aubainama. Rağanine ko tegotegona taugu aninoġotiguma aubainama. ²⁶ Be rağanine taumi uma buredinama ko kanikani be uma keyekinama ko tegotegona, taumi Bada na gurima ko rauguguyena naumeki da tauna na kaba yovo munaġama rağanine.

²⁷ Vutuna aubainama aitau da uma buredinama kwa kanikani yababe be uma keyekinama kwa tegotego yababena, inam Bada na gurima be kosininama ya darorona tam mate wavunama kwa kiroġina. ²⁸ Vutuna aubainama taumi mayemima ko paġo munaġena, muriġa da buredi ko kani be keyake ko tegona. ²⁹ Baninama deġoda taumi Bada tubuġinama ko kanikani be kosininama ko tegotego be nam koma noġonogota kauena da inam Bada tubuġinama be kosininama, naumeki da taumiġa ko kovokovogħa munaġemina. ³⁰ Vutuna aubainama nopomie banaga toitoi ta sidasida, tubuġidima ta vovo gwaġaqwaġa, be ġesaudima ta gurigurina. Turiya inam nam maika waikanikani ġoma.

³¹ Be deġoda tauda tà kita wairuva munaġeda be tà turiyana, tauda tokare nam kovoġa tà

banavi. ³² Be deḡoda Bada e kovoḡidana, inam waikatakatai e uteutedana da tokare tauda nam gienae tà naḡo dobu banegidima mate. ³³ Vutuna aubainama yau bana, taumi turiya aubainama kowai rawateḡeimina raḡanine, ami banagama ko rabedi be nam taumi kani koi paparane. ³⁴ Be aitauḡa da kani e karatimina, taumi ami vadae sibo koya kani nonoḡana, muriḡa da sibo koyai rawateḡeimina. Inam tokare Bada nam e kovoḡimi.

Taugu yà tavana ḡaromie raḡanine, yaba ḡesaudima mate yà kawa didimanidina.

12

Arua Babau na puyoma

¹ Be yodi yau bana, puyo Arua Babaue na kauama yà riuemina, inam kauinama sibo koya kataiena aubainama. ² Ko noḡoti da taumi nam kowai sumaḡana raḡanine, taumi kokoitau awai bademina, be uma kokoitaudima taudi nam giugiudi be taudi awai keda doka waigewemina. ³ Be yodi deḡoda banaga ko banabanavidina aitauḡa Mamaitua na kauama ta giugiuena, taumi nema ko katai bake da uma banegidima ta riuriu kaua bo ta kaikaiyovu? Naumeki da umanama tokare ko kataiena: Deḡoda ai banaga Arue e giugiuna, tauna tokare nam aba gewagewanama Yesu ḡarone e giue. Be teneginama nama aitau da Arua Babau ḡarone, tauna tokare e riuna, “Yesu tauna Bada.”

⁴ Arua Babau tenaḡa, be puyo tabu be tabu banaga e uteutedana. ⁵ Be noya inam tabu be tabu, be Bada tenaḡa aubainama tà noyanoyana.

6 Be Mamaitua tenaḡa, be noya tabu be tabu banaga nopode e voivoiedina. **7** Uma kauidima Arua tauwai sumaḡa e uteutedana da ekalesia anisagudima aubainama.

8 Arua tauwai sumaḡa tenatenaḡaḡa uma puyodima e uteutedina:

 Waria nuauyauya taugiuuedima,
 waria katai taugiuuedima,

9 waria tauwai sumaḡa,

 waria Tauwai yawasana,

10 waria mataira tauvoiedima,

 waria tauwai peroveta,

 waria arua tabu be tabu adi yawasanama taulataiedima,

 waria bona tabu be tabu taugiuuedima,

 waria bona tabudima tauvitaredima.

11 Arua Babau tauna tenaḡa, be uma kauidima matabudi na ġoane nama tauwai sumaḡa tenatenaḡaḡa e uteutedina.

Tubuḡa tenaḡa be ragaraganama toitoi

12 Tubuḡa tenaḡa be ragaraganama toitoi. Be avedi da ragaraganama toitoi, tubuḡa yaġoro inam tenaḡa. Be kauinama teneġinama nama Keriso ġarone, **13** baninama Arua Babau tenaḡa. Be inam Arua babaune tauda matabuda tè babbaitona da tauda yodi tubuḡa tenaḡa, avedi da noġone tauda Jiu, bo Gurik banegidama, bo taunoya yababa bo deġo da nam taunoya. Matabuda Arua teneġinama tè paġona.

14 Tauda tè kataie da tubuḡa nam raganama tenaḡa, ibewa da ragaraganama toitoi. **15** Deġoda yodi sibo kaġa ya riuna, “Taugu nam nima, vu-tuna aubainama taugu nam tubuḡa ġarona.” Be

inam nam nama. Kaḡa yaḡoro tubuḡa ḡaronama. ¹⁶ Be deḡoda yodi sibo bea ya riuna, “Taugu nam mata, vutuna aubainama taugu nam tubuḡa ḡaronama.” Be inam nam nama. Bea yaḡoro tubuḡa ḡaronama. ¹⁷ Be yodi ko noḡoti, deḡoda tubuḡa matabuna i rawamatana, nema tokare kuyai beavaia bako? Be deḡoda tubuḡa matabuna i rawabeana, nema tokare pana bo ḡabu kuya vaia bakedi?

¹⁸ Be Mamaitua tubuḡa ya voienna be na ḡoane nama rageragedima tabu be tabu ya biridina. ¹⁹ Deḡoda rageragedima matabudi sibo raga tenaḡa, tubuḡa tokare deḡo? ²⁰ Vutuna aubainama raga toitoi, be inam yaḡoro tubuḡa tenaḡa. ²¹ Mata nam teneteneḡina da nima sibo ya riuena, “Taugu è tuaḡaiemna.” Be deba nam teneteneḡina da kaḡa sibo ya riuena, “Taugu è tuaḡaiemna.”

²² Ibewa, be tubuḡa raganama anikitanama maika kabe nam aiyaba, ibewa da adi noyama yaḡoro ta kenakenana. ²³ Be deḡo ragedima tà noḡonoḡoti da nam aniviviviredi, taudi tà vivira kauedina. Be deḡo ragedima waitunimayamayaḡidima, tàwai gara kauedina, ²⁴ be deḡo ragedima nam waitunimayamayaḡidi, tauda nam tamawai gara kauedina. Be teneḡinama nama Mamaitua tubuḡa rageragedima yai rawateḡeidi da taudi tubuḡa tenaḡa, be raga ḡesaudima kamai ragaraga ya voiedi da banaga ta viviviviredina. ²⁵ Mamaitua nama ya voienna, baninama nam sibo tubuḡa ya daberara be raga matabuna sibo turanama turanama mate ai rabaraba vivirana.

²⁶ Vutuna aubainama deḡoda raga tenaḡa ei nuatoitoina, naumeki da raga ġesaudima mate tai nuatoitoi saguna. Be deḡoda raga tenaḡa isanama banaga ta kaisuġuna, naumeki da raga ġesaudima mate tai nuaverena.

²⁷ Be yodi yà riuemi da taumi matabumi inam Keriso tubuġinama, be taumi tenatenaḡaḡa inam raganama. ²⁸ Be ekalesia nopone Mamaitua noya tabu be tabu tauwai sumaḡa ya utedina:

Noḡone apasol noyanama,
murine waiperoveta noyanama,
murine tauwai katakatai noyanama,
da mataira tauvoiedima,
da Tauwai yawasana,
da tauwai sagu,
da waibada noyanama,
da bona tabu be tabu taugiuuedima.

²⁹ Be yodi banaga matabudi inam apasol, bo? Bo matabudi tauwai peroveta? Bo matabudi tauwai katakatai? Bo matabudi mataira ta voivoiedi?
³⁰ Bo matabudi Tauwai yawasana? Bo matabudi bona tabu be tabu taugiuuedi? Bo matabudi bona tabudima tauvitaredi? Ibewa! ³¹ Ko raurubu gurata da puyo dosidima ko ragaudina.

Be yodi keda vere vavasaġinama yài kataimina da nema sibo inam puyodima koya noya bakedina.

13

Wainuapaġo

¹ Deḡoda taugu banaga bo anea adi bonae sibo è giugiuna, be deḡoda taugu wainuapaġo nam ġarogue, taugu inam maika toutou

yababa bo maika boīgatu yà gugugugura yababayababana. ² Bo dēgoda taugu waiperoveta puyonama ġarogue be Mamaitua na kauama moimoisiridima matabudi sibo è kataiedina, be dēgoda katai ġesaudima mate sibo è kataienā, be dēgoda yau waisumaġġama dosi vavasaġinama da taugu sibo oya è riue be ya tauriana, be dēgoda taugu wainuapaġo nam ġarogue, naumeki da taugu inam nam aiyaba be Mamaitua ya kita tuaġaiieguna. ³ Bo dēgoda yau purapurama matabuna banaga waikaruwaġewaġedimā yà utedina, bo dēgoda vari verenama kana taiye tubuġiguma sibo a gabu goruna, be dēgoda taugu wainuapaġo nam ġarogue, inam tokare nam yau maesa.

⁴⁻⁶ Wainuapaġo baneginama tauna banaga ġarodie ewai nuabagibagi be e raraukivi verena.

Tauna nam ima unuunura.

Tauna nam ima seġaseġara.

Tauna nam ima rarau guyaguyau.

Tauna nam kivinama gewagewana.

Tauna nam taunaġa ima noġonoġota munaġe.

Tauna nam meditupo banegina.

Tauna nam gewagewa nuapikanama nopone ima noġonoġotina.

Tauna nam gewagewa kauidima ima ġoeġgoedina, be tauna riukaua e ġoeġoe kauena.

⁷ Tauna raġan matabuna ġarone piripiri ewai dami poredina.

Be raġan matabuna na banagama ewai sumaġgedina, be e noġonoġoti da tokare yaba matabuna naumeki.

Be rağan matabuna piripiri nopolie tauna e kaikai guratena.

⁸ Baninama wainuapaño tauna kenakena nonoğinama. Be waiperoveta tokare e kovina, be bona tabu be tabu giuenama tokare e kovina, be waikatakatai giunama tokare e kovina.

⁹ Baninama yodi tauda aba tè kataiena inam ġaubo ġominama, be aba tawai perovetena inam ġaubo ġominama. ¹⁰ Be tokare Bada na kaba verauma rağanine, aba ġaubo ġominama tè kataie be tawai perovetana, tokare e kovina.

¹¹ Rağanine taugu ġaubogue taugu yau giuma inam gomana maika. Be yau noğotama gomana maika, be taugu yaba matabuna è kitakita wairuvedina gomana na noğote. Be taugu è moramorabana rağanine, taugu seda adi kauama è gose poredina. ¹² Be teneğinama nama yodi tauda Mamaitua na kauama, nam tama kitakita kauena maika garasi gapugapunama nama. Be tokare taugu Bada noğonama matağomigue ya kitana. Yodi ġaubo ġominama è kataiena be tokare yaba matabudi ya katai kauedina, maika yodi Mamaitua nopolguma ya katai kauena nama.

¹³ Be rağan ġaubonağā yodi uma yabedima rabuiteğā ta kenakenana: Waisumağā, noğota bagibaginama be wainuapaño. Be nopolie wainuapaño inam ya sağā guratana.

14

Waiperoveta be bona tabu be tabu puyonama

¹ Vutuna aubainama wainuapaño sibo koya wane guratena, yodibe Arua Babau puyonama

ko wanena. Be ko raurubu da waiperoveta puyonama ko pañona. ² Baninama taumi aitaugā bona tabu tabu ko giugiuna, taumi nam banaga ġarodie koma giugiuna be Mamaitua ġarone, baninama aba ko giugiuena banaga nam ti kataiena. Be taumi Arue giu moimoisiridima ko giugiuna. ³ Be deġoda banaga aitaugā tawai perovetana, taudi inam banaga ġarodie ta giugiuna, da arue sibo ai rewapana, a duġudi be a riu wainu-asubesubedina. ⁴ Aitaugā bona tabu be tabu ta giugiuena, taudīga ta sagusagu munaġedina, be aitaugā tawai perovetana, taudi ekalesia ta sagusagudina.

⁵ Bona tabu be tabu giuedima inam matabuna naumeki, be taugu yà goeġoe guratena da taumi matabumi sibo koyai perovetana. Tauwai peroveta tauna banaga dosinama, nam maika bona tabu tabu taugienama nama. Be deġoda bona tauvitarena mate, inam naumeki, baninama ekalesia tokare sagu ta banavina.

⁶ Naumeki yau bana, deġoda ġaromie yà verau be bona tabu yà giuemina, taumi tokare nam sagu ko banavi. Ibewa da taugu waimaġatara giuna, bo Mamaitua na giuma, bo waiperoveta, bo waikatakatai giunama, nama sibo è riuemina, tokare sagu koya banavina. ⁷ Turai bo gita ko noġotidi, taudi nam banaga maika tima yavuyavutuna, be yaġoro ta gugugugurana. Be deġoda banaga turai bo gita digirienama nam i katai kauena, tokare nema bonanama ġaroronama kwa vaia bake? Be deġoda waidigirienama e kataie be e paġo vitavitaredina, tokare bonedima ġaroronama kwa vaiena. ⁸ Be

mate bogigi deḡoda nam ta suve yaḡe, tokare nema banaga ta rawateḡei bako? ⁹ Be teneğinama nama ġaromie. Deḡoda ami giuma matabudi neġo, tokare banaga nema ta katai bake da taumi aba ko giugue? Taumi inam ko giugiu yababana.

¹⁰ Be yaḡoro è kataiena da dobu matabuna no-pone bona matabudi banidima mate. ¹¹ Vutuna aubainama deḡoda banaga e giugiu be taugu na giuma baninama nam ya kataie, naumeki da taugu wari dobu banagiguma, be tauna wari dobu banaginama. ¹² Be teneğinama nama taumi ġaromie. Deḡoda puyo Arue ko ḡoedina, naumeki ko kita da inam puyodima ekalesia sibo ya sagudina.

¹³ Naumeki da banaga aitau bona tabu e giugiuena, tauna Mamaitua sibo yai baġa da rewapani ya ute, da uma giudima ya vitaredi be ya kawa negenegedina. ¹⁴ Taumi uma kauinama ko noġoti: Deḡoda taugu bona tabune è moiragina, inam taugu yau aruama e moimoiragina, be taugu nam aba ama noġonogotina, ibewa.

¹⁵ Naumeki da yodi aba ya voie? Taugu arue ya moimoiragi be yau noġote mate ya moimoiragina. Taugu arue ya saresare be yau noġote mate ya saresarena. ¹⁶ Be deḡoda tam Mamaitua isanama arue kwa kaikai suġuna, tokare banaga ġesaunama “Inam riukaua” nema e vato bake? Baninama tam aba kwa giugiuena tauna nam i kataiena.

¹⁷ Tam agunai moiragi verene kwa moimoiragina Mamaitua ġarone, be you, uma moiraginama banaga ġesaudima nam ima sagusagudina.

¹⁸ Taugu Mamaitua yà kaiwe da taugu bona tabudima toitoi yà giuguedina, nam maika taumi. ¹⁹ Be taparoro nōpone è nōgoti da ya vere kauana da taugu giu raubisāga negenegedima yà vatodi da banaga ta kataiedina, be nam giu toitoi da banaga tokare nam ta kataiedi.

²⁰ Yau bana uma kauidie nam seda maika kowai nōgota, ibewa da banaga batuturidima adi nōgote koi nōgotana. Be gewagewa nōgotidima ta tavatavana rāgandie, naumeki da taumi seda wawaídima maika sibo koya miana. ²¹ Girugiruminama porane Bada umanama ya riuna,

“Tokare taugu wari dobu banegidima yà riuporedina Israel banegidima ġarodie.

Be uma banegidima wari bonae ta giuna Israel banegidima ġarodie,
taudi yāgoro tokare nam tai beavaiegu.”

²² Vutuna aubainama yodi tà kita da bona ġesaudie giugiunama, inam mataira eteni banegidima aubaidima, be nam banaga e sagudi da tai sumāga. Be waiperoveta giunama inam vutuna banaga e sagudi da adi waisumāgama ei rewapanana. ²³ Deġoda taumi taparoroe ami wairawateġeima rāganine, be matabumi bona tabudie tabudie ko giugiu be eteni baneginama i sāga nōpomie be i vaiemina, tauna agunai tokare ya riuwai buebuemina. ²⁴ Be deġoda matabumi Mamaitua varinama ko giugue be eteni baneginama nōpomie i sāga be i vaiena, dabudine ami giuma tokare nōponama ya tiremi be ya kataie munāge da tauna gewagewa baneginama. ²⁵ Be na nōgotana semosemodima

matabudi ta mağatara be tauna tuapikane e raupari be Mamaitua isanama e kaisuğusuğu be e riuna, “Riukaua da Mamaitua nopomie e miamiana.”

Taparoroe yaba matabudi na didimanae sibo a voiedina

²⁶ Vutuna aubainama yau bana, uma yabedima ya giugiu edina, matabudi tà rawatupetupedina. Be ami wairawateğeima rağanine banaga ġesaudima tausaresare, be ġesaudima tauwai katakatai bo Mamaitua aba ewai kataidina taugiu edima, be ġesaudima bona tabu be tabu taugiu edima, be ġesaudima bona tabudima tauwai toropetaenama. Be yaba matabudi ko voivoiedina inam ekalesia anisagunama aubainama. ²⁷ Değoda banaga bona tabu be tabu taugiu edima, naumeki da banaga rabui bo rabuiteğä, be nam ġesaudima mate. Dabudine waria sibo ya giu ya kovi da waria. Be nam matabudi ta giugiu tenağä. Be waria sibo adi giuma yai toropeta da banaga sibo a kataiena. ²⁸ Be taparoro nopone değoda toropeta ibewa, naumeki da matabudi sibo nam a giu. Be aitau e ġoena, naumeki da taunağä nuane Mamaitua mate sibo ai giuna.

²⁹ Be tauwai peroveta rabui bo rabuiteğä sibo a giuna, be banaga ġesaudima taudi adi giuma sibo a kita wairuva yağedi da adi giuma inam naumeki bo ibewa. ³⁰ Be değoda aitau banegi-nama miemieninama Mamaitua noğota e utena, inam naumeki da tauna e giuna, be turanama giugunama sibo yai nuatuğuna. ³¹ Inam kauine tauwai peroveta matabudi tokare ta giuna, wari

peroveta e giu e kovi be war i peroveta e giugiuna. Inam nama banaga matabudi tai katakataidi be ta sagudina. ³² Be uma kauinama ko nođoti: Deđoda banaga aitau Mamaitua nođota ya utena, naumeki da tauna rewapanā ġarone e kenakenana da ei nuabagibagi be ei rabana, naumeki da na giu raġoninama e tavana, yodibe e giuna. ³³ Inam baninama Mamaitua tauna suba banegi-nama, be tauna nam ima ġoegoena da yaba tà voia yababayabedi, avedi.

Ekalesia matabudi adi vaivaima inam ³⁴ raġonine adi waitaparoroma nopone waiwaivi nam sibo a giugiu yababayaba, be waivi na tauġomama na waibadama dibune sibo ya miana maika tarawatu e riuriuna nama. ³⁵ Deđoda taudi aba waitaraviranama ġarodie e kenana, naumeki da taudi sibo a naġo vadae be adi tautauġomama sibo ai taraviredina. Baninama inam yai tunimayamayaġana da waiwaivi adi wainua nođonođotama ta giuedina taparoro nopone.

³⁶ Naumeki da uma giudima ko katai kauedina, baninama Mamaitua na giuma nam taumi ġaromie i tubuġana, be nam taumi koma waibadena, be na giuma nam taumiġa aubaimi. ³⁷ Deđoda taumi aitaugħa ko nođonogħotina da taumi Mamaitua na perovetama bo puyo Arue koya paġona, naumeki da taumi taugu aba ġaromie ġi rugħiġi minn sibo koya katai kauena da inam Mamaitua na riuvavasaġġa. ³⁸ Be deđoda aitau uma giudima e riuwai kaikaiyovuedina, naumeki da tauna mate ko riuwai kaikaiyovuna.

³⁹ Vutuna aubainama yau bana, Bada koi baġa

da ami taparoroe taumi sibo Bada na giuma koyai perovetaena. Be nam bona tabu be tabu giuenama ko riutuatuāgāie, ⁴⁰ be yaba matabudi adi didimanae sibo koya voia yağedina.

15

Keriso na midisuğu munağama

¹ Yau bana, pakane vari verenama è rarauguguyena, taumi yodi koyai aninena be debane ko midimidina, vutuna yodi yà riuwai noğotimina. ² Değoda uma varinama ko kaiguratena, taumi yawasana kenakena nonoğinama ko banavi, değoda ibewa, naumeki da ami waisumağama inam kavakavanama.

³ Taugu aba da Mamaitua ġarone è pağopağona inam kaua dosinama, vutuna taumi è utemina. Be inam varinama inam umanama: Yesu Keriso dà gewagewama aubainama ya gurina, maika girugiruminama poranama e riuriuna nama, ⁴ da taudi a dobo be rağan aniwai rabuiteğane Mamaitua ya kawa midisuğu munağena, maika girugiruminama poranama e riuriuna nama. ⁵ Be murine Bada Yesu Pita ġarone ya mağatarana, da apasol 12 ġarodie mate tauna ya mağatarana. ⁶ Be murine tauna rağan tenağta tauwai sumağta 500 be ġesaudima mate ġarodie ya mağatarana. Be banegidima ġesaudima yağoro ta miamiana, be ġesaudima a kovina. ⁷ Be muriğta tauna Jeims ġarone ya mağatarana, da murine apasol matabudi ġarodie ya mağatarana. ⁸ Be matabudi muridie, avedi da taugu muriğta ġoma Arue è tubuğana, be yağoro Bada Yesu taugu

garogue ya mağatarana,⁹ baninama taugu apasol nopolie è yovo guratana aubainama, nam apasol gesaudima maika. Be taugu nam veregu da sibo ai isaguna apasol, baninama taugu boni Mamaitua na damma è raraukivi gewegewedina aubainama.

¹⁰ Be Mamaitua na raukiviveree taugu yodi apasol. Be na raukiviverema nam i ute yababeguna, ibewa da taugu è noya guratana, nam apasol gesaudima maika. Be uma noyanama nam tauguğā yau rewapanae e voivoiedina, ibewa da Mamaitua na raukiviveree. ¹¹ Be avedi değoda apasol gesaudima ta noyanoya gurata bo taugu yà noyanoya guratana, be matabumai inam vari teneğinama ka rarauguguyena, inam vutuna taumi kowai sumağena.

Tauda dà kaba midisuğuma

¹² Tauma Keriso gurie be ya midisuğu munağana varinama kè rarauguguyena, be taumi uma varinama koyai sumağena. Be yodi gesaumima nemanama da ko riuriuna da banaga guriguridima tokare nam ta midisuğu munağā? ¹³ Değoda inam riunama riukaua, naumeki da Keriso mate tokare nam ya midisuğu munağā. ¹⁴ Be değoda Keriso nam i midisuğu munağā, naumeki da tauma ama rauguguyama be ami waisumağama inam nam banibiribiridi. ¹⁵ Be değoda inam nama, tauma tokare Mamaitua na matamatama kaikaiyovumaima. Baninama tauma noğone kè riuemina da Mamaitua tauna Keriso gurie be ya kawa midisuğu munağena. Be değoda banaga guriguridima tokare nam

ta midisuğu munağɑ, naumeki da vari kè raraу guguyena inam kaiyovu. ¹⁶ Baninama değoda banaga guriguridima tokare nam ta midisuğu munağɑ, naumeki da Keriso mate tokare nam ya midisuğu munağɑ. ¹⁷ Be değoda Keriso nam i midisuğu munağɑ, naumeki da ami waisumağɑma inam kavakavanama, be taumi yodi yağoro sibo gewagewae koya miamiana. ¹⁸ Be mate taudi aitaüğɑ Keriso tauwai sumağenama banegidima a gurigurina, taudi tokare nam yawasana ta banavina. ¹⁹ Değoda tauda dobüğɑ na yawasanama aubainama Kerisoe tài sumağana, o kapore wainuatoitoidama, tunidağɑ tà kwapukwapu yababena.

²⁰ Be Mamaitua riukaua da Keriso gurie be ya kawa midisuğu munağena. Tauna banaga guriguridima nopolie be Mamaitua ya kawa midisuğu dokena. ²¹ Banaga tenağɑ kana taiye guri ya tubuğana, tauna vutuna Adam. Be kauinama teneğinama nama banaga tenağɑ kana taiye midisuğu munağɑ ya tubuğana, tauna vutuna Keriso. ²² Vutuna aubainama Adam kana taiye matabuda tà gurigurina. Be Keriso kana taiye matabuda tà yawasanana. ²³ Be tauda dà rağanima boruborune nama tà midisuğu munağana. Noğone Keriso ya midisuğu dokana, be murine na kaba verau munağama rağanine, Keriso na banagama ta midisuğu munağana, ²⁴ yodibe rağan damonama e tavana. Inam rağanine Seitan be banaga adi rewapanan be adi waibadama matabudi Keriso e kawa gewegewedina. Be murine tauna na

waiguyauma Tamanama e utena. ²⁵ Be Yesu Keriso ei badana, naumeki da Mamaitua Keriso na āgaviamma Yesu kaāganama dibune e biridina. ²⁶ Be na āgaviamma damonama inam guri vutuna e kawa gewagewana. ²⁷ “Mamaitua yaba matabudi Keriso kaāganama dibune ya biridina.” Be tà katai kaue da yaba matabudi Keriso kaāganama dibune ya biridina, be nam tauname mate. ²⁸ Raāganine Mamaitua yaba matabudi Keriso kaāganama dibune e biribirdina, murine Keriso tauna mate Tamanama na waibadama dibune e miana. Yodibe Mamaitua tauna vutuna yaba matabudi ei badedina.

²⁹ Be deēgoda banaga guriguridima nam ta midisuū muñāga, naumeki da taudi aitaūga adi banagama guriguridima aubaidima a babababataitona, tokare nema ta voia bako? Bo aba aubainama taudi adi banagama guriguridima aubaidima a babataito? ³⁰ Be tauma nemanama? Banaga toitoi uma noyanama ka voivoiena debane ta āgasīgasíemaina, be raāgan matabuna ta āgoēgoena da sibo ai gurimaina. Deēgoda banaga gurie nam ta midisuū muñāga, naumeki da tauma aba aubainama uma varinama sibo kè naāgo be banaga āgarodie kè rauguguya nawe? ³¹ Yau bana, riukaua yà riuriuemina da tauma raāgan matabuna guri ka kitakita saāgena. Be tauma Bada Yesu Kerisoe ka rarauguyauemina. ³² Deēgoda gurie midisuū muñāga ibewa, naumeki da taugu Epeses nopone nam sibo guri è kita saāgesāge. Deēgoda inam nama, naumeki da “Tauda yodi tà kani, tà tego, be pomai tà gurina.”

³³ Ko kita kaua da nam aitau ei kedadoka waigewemi. Degoda gewagewa banegidima koi turanedina, taumi mate tokare ko gewagewana.
³⁴ Noğota viravira ko pa gó be bua giudima ko gose poredi. Be gewagewa mate ko gosed! Taumi ġesaumima Mamaitua nam ko kataiena, uma riunama yà riuriuemina da taumi sibo koya tunimayağana.

Midisuġu munaġa murine tubuġa nema maika kitana?

³⁵ Yodi ġesaumima agunai ko riuriuna, “Guri taudi nam tubuġa ġarodie be nema ta midisuġu munaġa bako?” ³⁶ Taumi buebuemi, bo? Pesi koya kumana tokare nam e gogo, ibewa da noğone e guri dokana, muriġa da e gogona. ³⁷ Be pesi kuya kumakumana tubuġinama inam semoe pesi nopone e kenakenana. Be pesi kwa kumakumana raġanine, nam pesi tubuġinama kuma kumakumana, ibewa da pesiġa kwa kumakumana, yaġoda bo pesi ġesaudima maika. ³⁸ Be Mamaitua uma pesidima tokare na ġoane nama pesi tubuġidima e utedina. Be nama pesi ġesaudima mate adi tubuġe adi tubuġe e utedina. ³⁹ Be uma kauinama teneġinama nama tauda ġarode. Tubuġa matabudi inam nam teneġidi. Banaga tubuġidima natabu, musara natabu, kiu natabu be iyana natabu.

⁴⁰ Be tubuġa marae be tubuġa dobue mate ta kennakenana. Be mara na tubuġama kitnama tabu be dobu na tubuġama kitnama tabu. ⁴¹ Suara

kitanama natabu, nawaravi natabu be kipora kitanama natabu. Be kipora tabu be tabu kitedima tabu be tabu.

⁴² Be inam kauinama teneğinama nama rağanine tauda gurie be tà midimidisuğu munağ'a rağanine, tubuğ'a doğ'a nopone boruborunama tokare e bovana. Be tubuğ'a midimidisuğu muneğinama tauna tokare nam e bova, ibewa be kenakena nonoğinama. ⁴³ Tubuğ'a doğ'a nopone tà boruboruna, kitedima nam ti verena. Be tubuğ'a e midimidisuğu munağ'a, tauna kitanama ya vere vavasağ'a. Tubuğ'a doğ'a nopone tà boruboruna, inam ya gwağagwağ'a, be tubuğ'a e midimidisuğu munağ'a, tauna yai rewapanana kauana. ⁴⁴ Tubuğ'a doğ'a nopone tà boruboruna, inam dobu na tubuğ'a, be tubuğ'a e midimidisuğu munağ'a, inam tubuğ'a arue. Değoda dobu na tubuğ'a e miana, naumeki da tubuğ'a arue mate e miamiana.

⁴⁵ Baninama girugiruminama porane umanama e riuriuna, "Banaga pakanama inam Adam, tauna dobu yawasaninama ya pağona." Be Adam wairabuinama muriğ'a ya tubutubuğ'a, tauna vutuna yawasana arue tauwai utaenama. ⁴⁶ Arua baneginama nam i dokana, ibewa da dobu baneginama. Muriğ'a da arua baneginama e tavana. ⁴⁷ Pakane Adamnama tauna doğ'a popokaune ya tubuğ'a, be Adam wairabuinama tauna marae be ya yovona. ⁴⁸ Tauda matabuda dobu banegidama. Vutuna aubainama tubuğidama inam Adam tubuğinama maika. Be değoda tauda Kerisoe mara banegidama te tubuğ'a, naumeki da

tauda tokare tubuğidama Keriso tubuğinama maika. ⁴⁹ Yodi tauda kitadama dobu baneginama maika, be tokare kitadama mara baneginama maika.

⁵⁰ Yau bana, yà riuriu kauemina da dobu na tubuğe, tauda tokare nam tà na gó marae be Mamaitua na waiguyauma tài buderie. Uma tubuğinama tokare e bovana be nam e kena nonoǵa. ⁵¹ Be yodi koi beavaie be taugu giu semosemonama yà riuemina: Tauda nam tokare matabuda tà guri, ibewa da tà tubuǵa vitarana. ⁵² Uma kauinama bogigi damodamone e riuriuna raǵanine, ei raǵantenaǵe da e tubuǵana, mata tau-taugabana maika. Bogigi e riuriuna raǵanine banaga guriguridima ta midisuǵu nonoǵana be nam ta bova munaǵa. Be yawayawasanidama tauda tà tubuǵa vitarana. ⁵³ Tubuğidama poranama tokare e guri be e bovana, be tubuǵa vaunama tokare nam e guri be e bova.

⁵⁴ Be tubuǵa vaunama tà paǵona raǵanine, dabudine peroveta na giuma e tubuǵana. Na giuma inam umanama:

“Vaisuba guri ya tonoǵina.”

⁵⁵ “Guri, am vaisubama deǵo?

Guri yodi am rewapanama deǵo?”

⁵⁶ Gewagewae guri na rewapanama e paǵopaǵona. Be tarawatue gewagewa e maǵamaǵatarana. ⁵⁷ Be Mamaitua tài kaiwe da Yesu Kerisoe anivai suba ya utedana.

⁵⁸ Vutuna aubainama yau bana, ami waisumaǵe ko midi da bagibaginaǵa, be nam aba e kawa dagudagumi. Raǵan matabuna Bada

aubainama ko noya guratana, be ko kataie da ami
noyama Bada ġarone inam nam kavakavana.

16

*Mane taminama Mamaitua na damma
Jerusalemma aubaidima*

¹ Naumeki be yodi mane taminama Mamaitua na damma aubaidima yà riuemina: Galesia banegidima è riuedi be nema a voivoia bakona, nama taumi sibo koya voiana. ² Sande patapatanama taumi tenatenaġaġa wiki nopone ami maesama ko paġopaġona na ruvae, rauġaubonāġa sibo koya boruboruna. Uma manenama koya boruboruna sibo koya vokaukaue be koya boru yaġe da ya kenana. Be taugu yà tavana raġanine nam mane yà tama. ³ Be mane kawakawa nonoġinama yà paġo be taumi banaga ko vinedi da ami manema yà utedi be yà riupore nawedina Jerusalemma, leta mate. ⁴ Be deġoda naġo ġarogue e verena, naumeki da matabumai ka naġo tenaġana. Pol na vaġaima yai ogrena.

⁵ Taugu Masedonia provinsnaġa yà verauna, be muriġa da taumi ġaromie yà dobina. ⁶ Agunai taumi ġaromie raġan bisanama yà rautapa miana. Bo deġoda bodubodu raġanine taumi mate tà mia, be murine taumi yau vaġiae ko saguguna. ⁷ Taugu nam yà tava ġaromie be yà naġo ġoma, ibewa da yà ġoēgoena taumi mate tà rautapa mia guratana, deġoda Bada ei anineguna nama. ⁸ Be yodi taugu Epesesma yà miana naumeki da Pentekost raġaninama e tavana, ⁹ avedi da banaga toitoi tawai ġavieguna be yau noyama kedanama

verenama ya nuaporaḡana aubainama, taugu yaḡoro uma dabudine yà miana.

10 Deḡoda Timoti ḡaromie e tavana, naumeki da ko rabe kauena, tauna nam ma nuaboyana ḡaromie sibo ya mia, baninama tauna Bada na noyama e voivoiena maika taugu. **11** Be nam aitau e riutuatuḡaqie, be ma nuasubana ko riupore verauġe da ḡarogue e tavana. Taugu Timoti na banagama mate yà raberabedina.

12 Be turaguma Apolos taugu è riu vavasaġena da tauna na banagama mate sibo a verauna ḡaromie, be tauna ya tuağaina. Be tauna na ḡoane nama tokare e verauna ḡaromie.

13 Koi kita kauana banaga kaikaiyovudima ḡarodie. Ami waisumäge ko midi da bagibag-inäḡa. Debemima e tora be koi rewapanana.

14 Yaba matabuna ko voiedina wainuapaġoe.

15 Akaia provins nopone Stepanas be na vadama nopone banegidima taudi Bada Yesu ai sumäḡa dokena. Be taudime ai uta munaḡedi da raġan matabuna tauwai sumäḡa aubaidima a noyanoya guratana. Vutuna aubainama yau bana, **16** taumi inam nama banegidima, aitauḡa ekalesia nopone a noyanoya guratana aubaimima, taudi vutudi ko voteyeteyedina.

17 Taumi nam ḡarogue ko tavana, aubainama taugu è tauwai nuaboyana. Be ami banagama Stepanas, Fotunatas be Akaikas ḡarogue a tavata-vana raġanine, taugu nuaguma ya vere kauana, **18** baninama taudi, taumi be taugu a duḡuda be taugu nuaguma ya verena. Inam nama banegidima, taudi vutudi ko viviredina.

Pol na waikaiwama

¹⁹ Mamaítua na damma matabudi Eisia provins nopone tawai kaiwemina. Be Akwila be Prisila mate Bada isane tawai kaiwa vavasağemina, be aitaúga adi vadae awai rawateğeidina taparoro aubainama, taudi mate tawai kaiwemina. ²⁰ Be tauwai sumağga uma dobudine, taudi mate tawai kaiwemina. Be wainuapağoe koi kaiwa vivirana.

²¹ Uma waikaiwa giunama inam taugu Pol nimague è girumina. ²² Aitau da Bada nam ei nuapağoe, Bada tauna tokare ei tara tautauena.

O Bada, kwa yovo!

²³ Bada Yesu na raukiviverema ġaromie e kennana.

²⁴ Be Yesu Kerisoe taumi matabumi yàwai nua-pağogemina.

**Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini**
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2